



Notat

Til:

Kommunestyret

Frå:

Jan Erik Boge

Søknader om kompensasjonstilskot i samband med koronapandemien - ny informasjon etter formannskapet si handsaming 10.02.2022

Saknr/Journalnr

22/65/22/1335//JEB

Arkivkode

FE-223

Dato:

17.02.2022

På saklista til kommunestyret 24.02.2022 står mellom anna sak om handsaming av søknader om kompensasjonstilskot i samband med koronapandemien. Saka vart handsama i formannskapet 10.02.2022. I saksutgreiinga hadde rådmannen eit framlegg til vedtak om fordeling av tilskotsmidlane som kommunen har fått (424 000 kroner). Formannskapet vedtok 10.02.2022 å senda saka vidare til kommunestyret utan tilråding.

Under formannskapet si handsaming 10.02.2022 vart det etterlyst meir informasjon om kva vurderingar som låg til grunn for rådmannen sitt framlegg til fordeling av tilskotsmidlane. Framlegget var som følgjer:

Verksemd	Tilskot
Bjørkheim Kro og Motell AS	90 000
Ine's Hudpleieklinikk	25 000
Milano Pizzeria	40 000
Muir Cateringservice	20 000
Thor Egil Nilsen (ferieleilegheit)	34 000
Thea Marie Steinsland (frisør)	75 000
Kate Hege Totland (frisør)	140 000
Sum	424 000

På bakgrunn av det som vart teke opp under handsaminga i formannskapet 10.02.2022, har sakshandsamar no utarbeidd dette notatet med utfyllande informasjon om saka. Det har etter handsaminga i formannskapet 10.02.2022 også kome nokre spørsmål frå lokalavisa Samningen som det kan vera relevant at kommunestyret får informasjon om. Denne informasjonen følgjer til slutt i dette notatet.

Innleiingsvis kan det også nemnast at sakshandsamar har opplevd denne saka som krevjande å førebu og handsama, mellom anna fordi regelverket for offentlege tilskot er omfattande og ikkje enkelt å setja seg inn i. Det er på den eine sida viktig at den tilgjengelege tilskotssummen på 424 000 kroner blir fordelt og raskt kjem næringsdrivande i kommunen til gode. Samstundes er det viktig med ei rettferdig fordeling av midlane, og at midlane skal tildelast i samsvar med gjeldande regelverk og vilkår. Det vil uansett vera vanskeleg å få til "millimeterrettferd" når det gjeld fordeling av midlane,

mellom anna fordi det for nokre verksemdar kan vera svært vanskeleg å dokumentera nøyaktig kva inntektstap dei har hatt. Det vil truleg ikkje vera mogleg å unngå at det må brukast skjønn i handsaminga av søknadene.

Vurdering av søknadene

Det går fram av saksutgreiinga at rådmannskontoret har fått bistand frå leiar i Samnanger Næringsforum til vurdering av søknadene. Etter formannskapet si handsaming 10.02.2022 er det utarbeidd utfyllande informasjon om vurderingane som låg til grunn for framlegget til vedtak i saksutgreiinga. Også dette er gjort i samarbeid med leiar i Samnanger Næringsforum. I tabellen nedanfor er den utfyllande informasjonen lagt inn med **grøn skriftfarge**.

Verksemd	Søknads-beløp	Forslag til tilskot	Kommentar/grunngeving
Bjørkheim Kro og Motell AS	95 173	90 000	Delvis kompensasjon for dokumentert inntektstap (tapte rominntekter) i periodane nov 2020 – jan 2021 og nov 2021 – jan 2022. Tilleggsinformasjon lagt inn etter formannskapet si handsaming 10.02.2022: Det er i vurderinga lagt vekt på at denne verksemda har mange tilsette (ca. 7-8 årsverk) og av omsyn til arbeidsplassar derfor bør prioriterast i høve til søkjarar som er einmannsføretak. Det vert foreslått at verksemda får eit tilskot som nesten tilsvarar den dokumenterte søknadssummen.
Ine's Hudpleieklinikk	100 000	25 000	Delvis kompensasjon for inntektstap i 2020 og 2021. Tilleggsinformasjon lagt inn etter formannskapet si handsaming 10.02.2022: Verksemda har ikkje fått kommunalt koronatilskot tidlegare. Det går fram av søknaden at klinikken måtte halda stengd i seks veker i 2020. Det lagt ved søknaden kopi av oppretting av kassakreditt, men ikkje dokumentasjon ut over dette. Det er i handsaminga av søknaden gjort ei skjønsmessig vurdering om at det er svært sannsynleg at verksemda hadde inntektstap i samband med mellom anna stenginga i 2020, og forslaget til tilskot er basert på dette.
Milano Pizzeria	703 335	40 000	Delvis kompensasjon for inntektstap i 2020 og 2021. Tilleggsinformasjon lagt inn etter formannskapet si handsaming 10.02.2022: Milano Pizzeria søkte i 2021 då om tilskot på kr 700 000, og fekk innvilga tilskot på kr 100 000 for tapte inntekter som følge av stenging og redusert skjenking (sjå vedtak i kommunestyresak 049/2021). Verksemda søker no igjen om ein stor tilskotssum. Det er ikkje lagt ved dokumentasjon på inntektstap i søknaden, men det er i handsaminga gjort ei skjønsmessig vurdering om at det er svært sannsynleg at verksemda hadde inntektstap i perioden med strenge koronatiltak rundt årsskiftet 2021/2022. På grunn av at inntektstapet ikkje er dokumentert, er også forslaget til tilskotssum basert på ei skjønsmessig vurdering.

Verksemd	Søknads-beløp	Forslag til tilskot	Kommentar/grunngeving
Muir Cateringservice	66 000	20 000	Delvis kompensasjon for inntektstap i 2021. <i>Tilleggsinformasjon lagt inn etter formannskapet si handsaming 10.02.2022:</i> Muir Cateringservice vart starta opp i 2021, og har som følgje av dette ikkje samanliknbare rekneskap frå tidlegare periodar. Forslaget til tilskot er basert på skjønn, det vert vurdert som sannsynleg at verksemda har hatt redusert omsetnad som følgje av koronapandemien (redusert tal arrangement, samlingar m.m. som har etterspurt caterintenster). På grunn av at inntektstapet ikkje er dokumentert, er også forslaget til tilskotssum basert på ei skjønnsmessig vurdering.
Thor Egil Nilsen (ferieleilegheit)	84 400	34 000	Delvis kompensasjon for inntektstap i 2021. <i>Tilleggsinformasjon lagt inn etter formannskapet si handsaming 10.02.2022:</i> Verksemda fekk i 2021 tilskot på kr 20 000 for tapte inntekter (sjå vedtak i kommunestyresak 049/2021). Søknaden i denne søknadsrunden gjeld tapte inntekter i 2021 (bortfall av leigeinntekter i perioden mai – juli). På grunn av at inntektstapet ikkje er dokumentert på annan måte enn med kopi av formidlingsavtale med firmaet DanCenter AS, er forslaget basert på ei skjønnsmessig vurdering om at verksemda har hatt eit vesentleg større samla inntektstap i 2020 og 2021 enn det dei fekk i kommunalt tilskot i 2021.
Thea Marie Steinsland (frisør)	200 833	75 000	Delvis kompensasjon for inntektstap i 2020 og 2021. <i>Tilleggsinformasjon lagt inn etter formannskapet si handsaming 10.02.2022:</i> Har ikkje søkt om eller fått koronatilskot frå kommunen tidlegare. Har berekna tapet sitt til ca kr 179 000 i 2020 og ca. kr. 22 000 i 2021, basert på kopiar av næringsoppgåver for 2019 og 2020 som ligg ved søknaden. Verksemda var heilt stengd i seks veker i 2020. Dei vedlagte næringsoppgåvene vert vurdert som berre delvis dokumentasjon på inntektstap. Forslaget til tilskotssum er basert på ei skjønnsmessig vurdering.
Kate Hege Totland (frisør - Klippe Kroken)	295 108	140 000	Delvis kompensasjon for dokumentert inntektstap i 2020 og 2021. <i>Tilleggsinformasjon lagt inn etter formannskapet si handsaming 10.02.2022:</i> Har ikkje søkt om eller fått koronatilskot frå kommunen tidlegare. Har berekna tapet sitt til kr 177 000 i 2020 og ca 118 000 i 2021, basert på kopiar av omsetningsoppgåver for 2019, 2020 og 2021 som ligg ved søknaden. Verksemda var heilt stengd i seks veker i 2020, og delvis stengd i november og desember 2021. Verksemda har ein tilsett i tillegg til eigar. I forslaget til tilskotssum er det teke omsyn til både det dokumenterte inntektstapet og den totale summen kommunen har til rådvelde i denne søknadsrunden.
Sum	1 191 914	424 000	

Spørsmål frå lokalavisa Samningen

Sakshandsamar mottok 15.02.2022 følgjande e-post frå redaktøren i lokalavisa Samningen:

Hei!

Prøver å skriva litt om kompensasjonstilskotet til lokale bedrifter, som formannskapet sende vidare til kommunestyret utan tilråding. Men har begynt å lura litt på kva som er realitetane.

I utlysingsteksten står det: «Samnanger kommune vel i denne runden å fordela midlane til verksemdar **som kan dokumentera** tapte inntekter og/eller meirkostnader i perioden **november 2021 til og med januar 2022**».

I innstillinga frå administrasjonen går det fram at fire av sju søkjarar ikkje har lagt ved dokumentasjon på det dei har søkt om. Fleire av dei har også søkt kompensasjon for eit anna, eller mykje lenger, tidsrom enn det som er oppgjeve i utlysinga.

I rettleiaren som ligg ved saka heiter det: «Kommunen kan ikke forskjellsbehandle virksomheter på bakgrunn av subjektive kriterier eller kriterier som ikke er oppgitt i kunngjøringen. Når midlene først er lyst under den nasjonalt notiserte ordningen, må kommunene dele ut midlene i henhold til de kunngjorte opplysningene».

Kan du forklara korleis de har tenkt her? Vil kommunen krevja dokumentasjon før midlane vert utbetalte? Kan det tenkjast at fleire ville ha søkt, dersom alle kunne operera med eit lengre tidsrom og/eller slapp å senda dokumentasjon?

Hallvard
Samningen

Som følge av dei spørsmåla/forholda Samningen tek opp i e-posten ovanfor, vil rådmannen tilrå følgjande:

1. at søknadsfristen for tilskotsmidlane i denne tildelingsrunden blir forlenga (d.v.s. at det blir opna for nye søkjarar i ein periode på ca. 14 dagar)
2. at rådmannen får i oppgåve å be om (ytterlegare) dokumentasjon på inntektstap/auka utgifter for dei søkjarane som dette blir vurdert som nødvendig for
3. at rådmannen får i oppgåve å leggja fram saka på nytt i formannskapet sitt neste møte 24.03.2022
4. at kommunestyret gir formannskapet fullmakt til å gjera vedtak om tildeling av midlane i denne tildelingsrunden (424 000 kroner)